

Wurd idem / so bald zugericht /
 Doch vmb ir gelt / vnd anders nicht /
 Ging aus dem Haus / thet stille stan /
 Vnd sach das Haus von aussen an /
 Was es alda het für gestalt /
 Es war gar fein arthlich gemahlt /
 Von farben / wie mans gsehen hat /
 Schwarz / ascherfarb / weis vñ auch rot /
 Gar zierlich schön / Es gab ein schein /
 Als wer es gmacht von Quaderstein /
 Obn auff dem Dach / zwen Roth Fahnen /
 Drin warn gmahlt drey weisse schwanē.

Wie weit zum Schießhaus.

So habt ir nun ghört manichfalt /
 Wie das schißhaus het ein gestalt /
 Ihr solt auch wissen / wol verstan /
 Wie weit man het zu schiessen nan /
 Von dem Schießhaus wol zu der wandt /
 Wils euch anzeigen mit verstandt /
 Hundert vnd Fünffvndzwanzig Eln /
 Die hab ich sehen zweymal zehln.

E ij

Wie